


Minister Hooyboer Winklaar: Gang di Arte tabata un exito rotundo

## Muchanan di Gang di Arte a demostra nan talento den un forma unico y hopi profesional



**DEN** Cas di Cultura a tuma luga e presentacion final di e hobennan cu a participa den e programa "Gang di arte". E muchanan a keda hunto pa un luna y mey. Nan a prepara pa duna lo maximo di nan creatividad y traha nan presentacion riba e topico "STRAÑO". Un total di 50 hoben a participa den e proyecto Gang di Arte. Minister di Asuntonan Economico, Social y Cultura, Sra. Michelle Hooyboer-Winklaar tabata presente y a keda encanta cu e presentacion di cada mucha y tambe cu e mensahe cu nan ta trece pa dilanti pa e otro hobennan. E mandatario a expresa cu esaki ta e di seis edicion di Gang

di Arte y ya caba por ripara cu e muchanan tin nan experiencia. Sinembargo, loke a ser mira durante e presentacion a coy tur e energia di e ultimo seis añan pone den sun solo show. Minister Hooyboer-Winklaar a sigui bisa cu e muchanan a demostra nan talento na un forma hopi unico. E topico "Straño", nan mester a incorpora esaki den cada un di nan presentacionnan. Por a mira e anochi aki canto, baile, teatro, film y hopi otro disciplina presenta den un forma excelente y hopi profesional. "Mi ta hopi orguyoso di e hobennan aki. Nan ta haci cu asina hopi dedicacion y amor pa arte. Esey ta

wordo demostra masha hopi mesora nan ta riba escenario presentando nan creacion unico. Tur hende den Cas di Cultura a wordo transporta den un mundo straño". E minister ta cataloga Gang di Arte un exito rotundo. E trabaonan di e hurado nan tabata hopi dificil. E ta haya cu tur e hobennan cu a participa ta ganadonan pa haci algo asina excepcional y excelente, a bisa. Tambe por a ripara cu e hobennan ta analisa e situacionnan cu nan ta pasa aden y ta transmiti un mensahe di conscientisacion, di compromiso cu nan mes y cu nan pais, e mandatario a manifesta.